

TULAFONO TAU FAAOFI O FUAINUMERA FAAMAUINA 2014

SAMOA

Faamatalaga e Faamalamalama ai

Upu Tomua

Na galalue le Ofisa o Fuainumera Faamauina a Samoa (“Ofisa”) i se galuega tau atinae mo ni tausaga e tele e taulai i le faamalosia o le mafai gafatia o le Ofisa i le aoina mai o fuainumera faamauina. O se tasi o vaega o lenei galuega tau atinae o le toe iloiloina lea e le Ofisa o le Tulafono o Fuainumera Faamauina 1971 o lo o faaaogāina nei (“Tulafono”), faatasi ai ma le faamoemoe ina ia faafou lea Tulafono e ala i le tusia o le Tulafono Tau Faaofi o Fuainumera Faamauina (“Tulafono Tau Faaofi”), ma le soloia o le Tulafono tuai.

Faamatalaina

O le sini autu o le Tulafono Tau Faaofi o le faafouina lea o le tulafono o lo o faafoeina ai le aoina mai, faamauina ma le auiliiliga o faamatalaga tau fuainumera faamauina mo le faamoemoe o le faalauiroaina atu o fuainumera faamauina aloaia. O lenei Tulafono Tau Faaofi o lo o amanaia ai faiga aupito sili ona lelei e faasino i lea lava tulaga. Ua faamalosia e le Tulafono Tau Faaofi vaega o le Tulafono o lo o faaaogāina nei e pei o:

- (a) Le matafaioi o le Faamu Fuainumera a le Malo i le aoina mai o faamatalaga;
- (b) Le tulaga tutoatasi o le Faamu Fuainumera a le Malo i le aoina mai o faamatalaga;

(c) Le tulaga agatapuia o faamatalaga e aoina mai, seja vagana ai o nisi tulaga e aliae mai lea e aofia ai, ae peitai e lē faatapulaaina i mataupu o le manuia lautele o le atunuu po o le saogalemu.

Fuaiupu:

VAEGA 1 – FAATOMUAGA

- Fuaiupu 1:** - ua aiaia ai mo le igoa puupuu ma le aso e amata faamamaluina ai le Tulafono. O le Tulafono Tau Faaofi o le a pasia e amata faamamaluina i le aso e tuuina i ai le maliega a Le Ao o le Malo.
- Fuaiupu 2:** - ua aiaia ai le faamoemoe o le Tulafono Tau Faaofi lea e aofia ai ma, ae peitai e lē faatapulaaina i le tausisia e Samoa o noataga faava o malo e faasino i fuainumera faamauina.
- Fuaiupu 3:** - ua aiaia ai e faapea o le Tulafono Tau Faaofi, o le a noatia ai le Malo i le taimi lava e tuuina i ai le maliega.
- Fuaiupu 4:** - ua aiaia ai mo le faamatalaina o uiga o nisi fuaitau ua faaaogāina i totonu o le Tulafono Tau Faaofi.

VAEGA II - FAAFOEGA

Vaevaega 1 – Ofisa o Fuainumera Faamauina a Samoa

- Fuaiupu 5:** - ua faavaeina ai le Ofisa.
- Fuaiupu 6:** - ua aiaia ai galuega tauave lautele a le Ofisa ina ia faamamaluina le faamoemoe o le Tulafono Tau Faaofi e pei ona faatulaga atu i lalo o le fuaiupu 2, ma tauave so o se galuega tauave ua faaee atu i ai e le Minisita e tusa ai ma le fuaiupu 25 o le Tulafono Tau Faaofi, po o e pei ona faatagaina e le Minisita

ina ia faia faapea i lalo o so o se isi lava tulafono.

Fuaiupu 7: - ua aiaia ai mo galuega tauave faapitoa a le Ofisa e faasino i le aoina mai ma le auililiina o faamatalaga tau fuainumera faamauina. O ia galuega tauave e aofia ai ae peitai e lē faatapulaaina i le feutagai ai ma isi faalapotopotoga a le Malo i galuega tau atinae tau fuainumera faamauina, ma le fautuaina o le Malo i mataupu e faatatau i faiga faavae tau fuainumera faamauina ma isi.

Fuaiupu 8: - ua tuuina atu ai le malosiaga i le Ofisa e faia ia gaoioiga talafeagai ina ia faatino ai ana galuega tauave e pei ona faatulaga atu i lalo o le Tulafono Tau Faaofi po o so o se isi lava tulafono.

Fuaiupu 9: - ua aiaia ai e faapea e faaaogā le *Tulafono o Galuega a le Malo 2004* i le Ofisa e faapei ai le Ofisa o se Matagaluega, ma faapea ona faatatauina ai se tagata faigaluega o le Ofisa o se tagata faigaluega a le Malo, mo le faamoemoe o le *Tulafono o Galuega a le Malo 2004*.

*Vaevaega 2 – Komiti Faatino Faufautua
o Fuainumera Faamauina*

Fuaiupu 10: - ua faavaeina ai le Komiti Faatino Faufautua o Fuainumera Faamauina ina ia aofia ai ia lē itiiti ifo i le toalima (5) ma ia lē sili atu i le toafitu (7) sui auai.

Fuaiupu 11: - ua faatulaga atu ai galuega tauave a le Komiti Faatino.

Fuaiupu 12: - ua aiaia ai manaoga mo fonotaga a le Komiti Faatino.

Vaeaega 3 – Faamau Fuainumera a le Malo

- Fuaiupu 13:** - ua aiaia ai e faapea e tofia le Faamau Fuainumera a le Malo i lalo o le fuaiupu 12 o le *Tulafono o Galuega a le Malo 2004*, ma faatulaga ai galuega tauave a le Faamau Fuainumera a le Malo i lalo o le Tulafono.
- Fuaiupu 14:** - ua aiaia ai e faapea e mafai e le Faamau Fuainumera a le Malo ona tofia Ofisa Sili Lagolago o Pulega ma isi tagata ofisa galulue tumau po o tagata ofisa lē tumau e pei ona manaomia mo le faamoemoe o le Tulafono.
- Fuaiupu 15:** - ua aiaia ai mo le tulaga tutoatasi o le Faamau Fuainumera a le Malo e fuafuaina ai e ia lava, po o a ituaiga faamatatalaga e aoina mai ma le auala e aoina mai ai, auiliili ma lomia faasalalau ma le tulaga e oo i ai, faatulagaga ma le taimi e lomia faasalalau ai fuainumera faamauina. Ua faapea foi ona aiaia ae e faapea e mafai e le Minisita ona tuuina atu se faatonuga i le Faamau Fuainumera a le Malo e uiga i mataupu e na o le Faamau Fuainumera a le Malo e fitoitonu i ai le faia o faaiuga.
- Fuaiupu 16:** - ua aiaia ai mo le malosiaga o le Faamau Fuainumera a le Malo i luga o lana pule faitalia, e tuuina atu ai manatu faaalia i fuainumera faamauina ua lomia faasalalau ina ia uunaia ai le malamalamaga e uiga i ia tulaga po o, le tali atu i manatu ua faaalia i ia lava mataupu.
- Fuaiupu 17:** - ua aiaia ai mo mea e manaomia le aofia ai i le lipoti faaletausaga lea e noatia ai le Faamau Fuainumera a le Malo e lomia faasalalau i lalo o le fuaiupu 15 o le *Tulafono o Galuega a le Malo 2004*.

**VAEGA III – TAIALA FAAVAE,
FAAMATALAGA MA FEUTAGAIGA**

- Fuaiupu 18:** - ua aiaia ai mo taiala faavae lautele a le Ofisa, lea e aofia ai ae peitai e lē faatapulaaina i le faamautinoa o tulaga agatapua o so o se faamatalaga e faaoo atu i le Ofisa.
- Fuaiupu 19:** - ua aiaia ai e faapea o faamatalaga ua aoina mai e tusa ai ma lenei Tulafono Tau Faaofi e ao ona faia mo na o faamoemoega tau fuainumera faamauina.
- Fuaiupu 20:** - ua aiaia ai e faapea o faamatalaga ua lomia faasalalau i lalo o lenei Tulafono Tau Faaofi, e tatau ona faatulagaina i se faiga lea e puipuia ai sea tulaga mai le faailoaina atu e so o se tagata e faapea, o se faamatalaga e faasino i se tagata faapitoa, seja vagana ai ua faamalieina nisi tuutuuga, e pei o le tagata na tuuina atu le faamatalaga ua malie i ai i le lomia faasalalau o ia faamatalaga.
- Fuaiupu 21:** - ua aiaia ae e faapea e ui lava ina agatapua i se tulaga lautele faamatalaga ua mauaina mai i lalo o le Tulafono Tau Faaofi, e ono mafai ona avanoa i nisi tulaga aliae mai, e pei o le tulaga i luga o le talosaga tusitusia a le Loia Sili, pe afai ua talosagaina faamatalaga mo le faamoemoe o le puipuiga o le Tulaga Saogalemu o le Atunu o Samoa ma isi tulaga faapena; e mafai e le Faamau Fuainumera a le Malo ona faaavanoa atu ia faamatalaga. ae vagana ai mataupu e manaomia i lalo o le fuaiupu 21(2), o faamatalaga ua maua mai i lalo o lenei Tulafono, e lē tatau ona faailoa atu mo le faamoemoe o le Tulafono o Malosiaga o Leoleo

2007 po o le Tulafono o Faamatalaga Molimau 1961 ma isi.

Fuaiupu 23: - ua aiaia ai le tautoga po o le tautinoga ua manaomia le faia e se tagata ofisa ua amataina ona tiute tauave i lalo o lenei Tulafono Tau Faaofi.

Fuaiupu 24: - ua aiaia ai le tautoga po o le tautinoga e manaomia le faia e so o se isi tagata o lo o fesoasoani i le aoina mai o po o le auiliiliina o faamatalaga i lalo o le Tulafono Tau Faaofi.

Fuaiupu 25: - ua aiaia ai e faapea, e mafai e le Faamau Fuainumera a le Malo i le maea ai o feutagaiga ma le Ofisa Sili o Pulega talafeagai po o le Pule Sili o se faalapotopotoga a le Malo ona fautuaina le Minisita ma le Minisita e nafa ma lea faalapotopotoga a le Malo i ana galuega tauave tau fuainumera faamauina, ina ia faatino e na o le Ofisa, po o le faatino faatasi ma le faalapotopotoga a le Malo.

VAEGA IV – TUSIGA IGOA MA SUESUEGA E AOINA MAI AI FAAMATALAGA

Fuaiupu 26: - ua aiaia ai mo noataga a le Ofisa e uiga i le tusiga igoa o le faitau aofai o tagata, fale ma faatoaga.

Fuaiupu 27: - ua faatulaga atu ai manaoga mo le tusiga igoa o le faitau aofai o tagata.

Fuaiupu 28: - ua aiaia ai mo le malosiaga o le Faamau Fuainumera a le Malo ina ia faia se suesuega o so o se mataupu ua tusia i totonu o le Pepa o Faamatalaga, lea e mafai ona teuteuina e le Minisita e ala i se Poloaiga e lomia faasalalau i totonu o le Nusipepa o le Savali.

- Fuaiupu 29:** - ua faatulaga atu ai manaoga mo le auala e aoina ai faamatalaga lea e noatia ai le Faamau Fuainumera a le Malo e faatino.
- Fuaiupu 30:** - ua aiaia ai le tiute tauave o se tagata e tuuina atu faamatalaga e manaomia i se tusiga igoa.
- Fuaiupu 31:** - ua aiaia ai e faapea afai ua manaomia se tagata e faaooina atu faamatalaga ua manaomia i se tusiga igoa ma e le i mauaina e lea tagata se pepa o faamatalaga talafeagai, ua noatia lea tagata ina ia maua mai se pepa o faamatalaga mai le Faamau Fuainumera a le Malo. O lenei tulaga e mautinoa ai e faapea o lo o usitaia e tagata uma manaoga ina ia auai i le tusiga igoa.
- Fuaiupu 32:** - ua aiaia ai mo nisi tuusaunoaga i tiute tauave lautele o se tagata mo se tusiga igoa e pei o le tulaga o le leiloa ona faitau pe tusitusi po o le lē atoatoa o le malosi o le tino.
- Fuaiupu 33:** - ua noatia ai faalapotopotoga i fafo o lo o faagaoioia i totonu o Samoa ina ia faamalieina noataga tau tusiga igoa ma/po o suesuega pe afai o lo o tauaveina e ia faalapotopotoga ni pisinisi i Samoa ma i ai ni tagata faigaluega i totonu o Samoa ia e mafai ona avea ma o latou sui ina ia faamalieina ai ia noataga.
- Fuaiupu 34:** - ua aiaia ai le aia tatau a le Faamau Fuainumera a le Malo i lalo o se tusi poloaiga e tuuina atu e se Faamasino e ulufale ai i so o se nofoaga o pisinisi ina ia asiasi tusi po o pepa aloaia o lo o teuina, ma manaomia ai so o se tagata ina ia faaoo atu meataitasi ua talosagaina mo le asiasi i totonu o le 48 itula po o sea vaitaimi umi e pei ona mafai ona faamaotiina mai.

Fuaiupu 35: - ua aiaia ai e faapea, e i ai i le Faamau Fuainumera a le Malo le malosiaga e talosaga ai mo le toe faaooina atu o faamatalaga mai se tagata.

VAEGA V – AIAIGA ESEESE

Fuaiupu 36: - ua aiaia ai e faapea, e mafai e le Faamau Fuainumera a le Malo ona tuuina atu se faasilasilaga i totonu o le Savali po o so o se isi lava lomiga faasalalau e faapea o le a faia se tusiga igoa po o se suesuega e manaomia ai faamatalaga e uiga i ituaiga galuega ua faamaoti mai e ao ona tuuina atu.

Fuaiupu 37: - ua aiaia ai e faapea o se pepa aloaia ua sainia e le Faamau Fuainumera a le Malo o se faamatalaga molimau lea ua lava atoatoa e faapea ai o le saini lea a le Faamau Fuainumera a le Malo, seja vagana ai ua faamaonia i se isi faiga e ese ai.

Fuaiupu 38: - ua aiaia ai mo soligatulafono ma faasalaga mo le solia o nisi vaega o le Tulafono Tau Faaofi ua faamamaluina.


Fuaiupu 39: - ua aiaia ai mo le malosiaga o le Minisita e lomia faasalalau ai se Faasilasilaga e tuuina ai faatonuga mo ituaiga fuainumera faamauina ia e mafai ona aoina mai, po o mataupu e talafeagai mo le faamamaluina atoatoa o le faafoega o le Tulafono Tau Faaofi ua pasia.

Fuaiupu 40: - ua aiaia ai e faapea e mafai ona faia tulafono faatonutonu e faatonuina ai nisi mataupu i lalo o le Tulafono Tau Faaofi ua pasia.

Fuaiupu 41: - ua soloia ai le Tulafono o Fuainumera Faamauina 1971, ma aiaia ai nisi mataupu tau soloaiga ma faia ai teuteuga faatupulaia i le Tulafono o le

Faamauina o Pepe Fananau Mai, Maliu
ma Faaipoipoga 2002.

Faamatalaga: - ua aiaia ai mo mataupu ia e mafai ona
faia ai se tusiga igoa po o se suesuega e
le Faamau Fuainumera a le Malo.



.....
(Hon TUILAEPA Fatialofa Lupesoliai Aiono

Neioti Dr. Sailele Malielegaoi)

PALEMIA MA LE MINISITA E NAFA MA LE
OFISA O FUAINUMERA FAAMAUINA

**TULAFONO TAU FAAOFI O FUAINUMERA
FAAMAUINA 2014**

SAMOA

Faatulagaina o Aiaiga

**VAEGA I
FAATOMUAGA**

1. Igoa puupuu ma le amataga
2. Faamoemoe o le Tulafono
3. O le Tulafono e noatia ai le Malo
4. Faamatalaina o uiga o upu

**VAEGA II
FAAFOEGA**

*Vaevaega 1 - Ofisa o Fuainumera
Faamauina a Samoa*

5. Faavaeina o le Ofisa
6. Galuega tauave lautele ma le mafai ona tali atu
7. Galuega tauave faapitoa
8. Malosiaga o le Ofisa
9. Faaaogāina o le Tulafono o Galuega a le Malo 2004

*Vaevaega 2 - Komiti Faatino
Faufautua o Fuainumera
Faamauina*

10. Komiti Faatino Faufautua o Fuainumera Faamauina

11. Galuega tauave a le Komiti Faatino
12. Fonotaga ma komiti

*Vaevaega 3 - Faamau
Fuainumera a le Malo*

13. Faamau Fuainumera a le Malo, galuega tauave ma malosiaga
14. Tulaga tutoatasi
15. Aia tatau e faaalia ai manatu e uiga i fuainumera faamauina
16. Lipoti faaletausaga

**VAEGA III
TAIALA FAAVAE,
FAAMATALAGA MA
FEUTAGAIGA**

17. Taiala faavae lautele
18. O faamatalaga e ao ona faaaogāina mo na o faamoemoega tau fuainumera faamauina
19. Maualuga o le tulaga agatapuia

- 20. Faatapulaaina o le faailoaina atu o nisi auiliiliga faatagaina
- 21. E lē mafai ona mauaina mai pe faailoaina atu faamatalaga agatapuia
- 22. Tautoga po o tautinoga a tagata ofisa e faasino i tulaga agatapuia
- 23. Tautoga po o tautinoga a isi tagata
- 24. Galuega tauave tau fuainumera faamauina a isi faalapotopotoga a le Malo
- 30. Tiute tauave ina ia maua mai pepa o faamatalaga mo tusiga igoa
- 31. Tuusaunoaga i tiute tauave lautele mo tusiga igoa
- 32. O pisinisi mai fafo o lo o faagaoioia i totonu o Samoa
- 33. Aia tatau tau asiasiga ma tiute tauave e usitaia ai o talosaga
- 34. Malosiaga e talosagaina ai le toe tuuina atu o faamatalaga

**VAEGA IV
TUSIGA IGOA MA
SUESUEGA E AOINA
MAI AI FAAMATALAGA**

- 25. O le Faamau Fuainumera a le Malo e faia tusiga igoa o le faiatua aofai o tagata, fale, ma faatoaga
- 26. Faamatalaga o le a aoina mai i tusiga igoa o le faiatua aofai o tagata ma fale
- 27. Suesuega ma isi tusiga igoa
- 28. Auala e aoina mai ai faamatalaga
- 29. Tiute tauave o le faamaeaina o pepa o faamatalaga ma tuuina atu o faamatalaga

- 35. E ao ona tuuina atu faasilasilaga i le Faamau Fuainumera a le Malo e uiga i le i ai o se galuega e faatino
- 36. Faamatalaga molimau
- 37. Soligatulafono
- 38. Faatonuga faa-Minisita
- 39. Tulafono Faatonutonu
- 40. Soloia, teuteuga tau soloaiga ma teuteuga faatupulaia

Faamatalaga

**VAEGA V
AIAIGA ESEESE**

2014, Nu.

O SE TULAFONO e faatonutonu faaletulafono ai le aoina mai, faamauina ma le auiliiliga o faamatalaga o fuainumera faamauina, mo le faamoemoe o le faalauiolina atu o fuainumera faamauina aloaia ma mo faamoemoega e fesootai i ai.

UA FAIA e le Fono Aoao Faitulafono a Samoa i totonu o le Palemene ua potopoto e faapea:

**VAEGA I
FAATOMUAGA**

1. Igoa puupuu ma le amataga-(1) E mafai ona taua lenei Tulafono o le Tulafono o Fuainumera Faamauina 2014.

(2) O lenei Tulafono e amata faamamaluina i le aso e tuuina i ai le maliega a Le Ao o le Malo.

2. Faamoemoe o le Tulafono - O le faamoemoe o lenei Tulafono ia aiaia le faatinoga atoatoa lelei o le:

- (a) faamaoopoipoina, aoina mai, auliili ma lomia faasalalau fuainumera faamauina aloaia e tusa ai ma faiga aupito sili ona lelei;
- (b) faia o tusiga igoa ma suesuega masani;
- (c) tausisia o noataga faava o malo a Samoa e tusa ai ma fuainumera faamauina;
- (d) tauaveina o isi galuega tauave e tusa ai ma ofisa resitala ma fuainumera faamauina;
- (e) tauaveina o so o se isi lava galuega tauave ma malosiaga lea e ono mafai ona faaee atu i le Ofisa po o le Faamau Fuainumera a le Malo i lalo o lenei Tulafono po o so o se isi lava tulafono.

3. O le Tulafono e noatia ai le Malo - O lenei Tulafono e noatia ai le Malo.

4. Faamatalaina o uiga o upu - I totonu o lenei Tulafono, ae vagana ai ua manaomia e le mataupu se isi uiga e ese ai:

“Ofisa” o lona uiga o le Ofisa o Fuainumera Faamauina a Samoa o lo o faaaauau pea i lalo o le fuaiupu 5; “pepa aloaia” e aofia ai faamatalaga o lo o tusia i pepa, faiga faaeletoroni, po o faatulagaga e faaaogā ai fuainumera po o so o se isi lava auala lea e mafai ona avanoa i ai po o le faaliliuina atu ai;

“fale e mau ai tagata”:

- (a) o lona uiga o se fale po o se fausaga, tusa lava pe tumau pe leai foi, lea ua faaaogāina atoa po o sona vaega mo le nofoia e tagata; ma
- (b) e aofia ai -
 - (i) se vaa po o isi vaa folau i totonu o so o se taulaga, uafu, po o se tuutaula i totonu o Samoa po o i so o se vaitafe po o se vaituloto po o se mea e malaga ai i le va o ni taulaga se lua (2) o Samoa; ma
 - (ii) se fale o mau totogi ai, se tamai fale lē tumau, karaveni, fale ie po o se nofoaga faalenatura po o e faia e tagata e mau ai; ma
 - (iii) se vaalele po o se taavale o so o se ituaiga,

ma afai o se fale ua lisiina atu, toe lisi atu i se tasi, po o o lo o umia i ni potu eseese o lo o nofoia e tagata eseese po o ni aiga, o ona vaega taitasi ua faapea ona lisiina atu e nofoia e tagata, o le a faatatauina lava o se fale e ese ai e mau ai tagata.

“Faamau Fuainumera a le Malo”:

- (a) o lona uiga o le tagata o lo o umia lea tofiga i lalo o le fuaiupu 13; ma
- (b) e aofia ai so o se tagata ofisa po o se isi tagata o lo o galue e avea o se sui o le Faamau Fuainumera a le Malo.

“Faatonuga” o lona uiga o se Faatonuga Faa-Minisita e tuuina atu i lalo o le fuaiupu 39;

“Minisita” o lona uiga o le Minisita e nafa ma le Ofisa;

“tagata ofisa”:

- (a) o lona uiga o se Sui Ofisa Sili o Pulega po o se tagata ofisa e galue tumau pe leai foi, po o se tagata faigaluega o lo o faafaaigaluegaina i le Ofisa; ma
- (b) e aofia ai le Faamau Fuainumera a le Malo ma so o se tagata o lo o galue i se konekarate mo auaunaga e faatino ai so o se tiute tauave o se tagata ofisa.

“Matagaluega” e i ai lona uiga tutusa ua tuuina i ai i lalo o le Tulafono o le Faatulagaga Faa-Minisita ma Matagaluega 2003;

“pepa o faamatalaga” o lona uiga o se faamaumauga tusitusia (tusa lava po o ua tusitusia i pepa, faaeletoroni po o fuainumera) o faamatalaga ua tuuina atu po o ua faaoo atu e so o se tagata i lalo, po o e pei ona manaomia e lenei Tulafono, lea e aofia ai faamatalaga e faailoa ai po o, ua faatagaina ai i se faiga tuusao pe leai foi le faailoagofieina o so o se tagata, pisinisi po o meatotino;

“Failautusi” o lona uiga o le tagata ofisa ua tofia i lalo o le fuaiupu 11(2)(a) e avea ma Failautusi o le Komiti Faatino;

“Faalapotopotoga a le Malo”:

(a) o lona uiga o se Matagaluega po o so o se isi lava faalapotopotoga po o se lala souopu o le Malo; ma

(b) e aofia ai se faalapotopotoga a le Malo ua lisiina i lalo o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001.

VAEGA II FAAFOEGA

Vaevaega I - Ofisa o Fuainumera Faamauina a Samoa

5. Faavaeina o le Ofisa-(1) O le Ofisa o Fuainumera Faamauina lea o lo o i ai nei i le taimi lea a o lumamai ai le amata faamamaluina o lenei Tulafono, e faaauau pea ma e toe faavaeina i lalo o lenei fuaiupu e avea o le Ofisa o Fuainumera Faamauina a Samoa.

(2) E mafai foi ona taua le Ofisa o le “SBS” po o “Fuainumera Faamauina a Samoa”.

(3) O le Ofisa o se lala souopu a le Malo, ma e galulue i lalo o tulaga faatonutonu a le Minisita ma le Faamau Fuainumera a le Malo e tusa ai ma a latou galuega tauave ma malosiaga faapitoa.

(4) O tulafono uma ia e faaaogā i ofisa, e faaaogā foi i le Ofisa e faapei ai o se faalapotopotoga a le Malo.

6. Galuega tauave lautele ma le mafai ona tali atu - O galuega tauave nei a le Ofisa:

- (a) o le galuega tauave autu o le faamamaluina lea o le faamoemoe o lo o i le fuaiupu 2;
- (b) o isi galuega tauave ua faaee atu i ai e -
 - (i) le Minisita, o lenei Tulafono po o so o se isi lava tulafono;
 - (ii) le fuaiupu 25 po o le tuuina atu o malosiaga i lalo o so o se isi lava tulafono.

7. Galuega tauave faapitoa - O le Ofisa e i ai galuega tauave faapitoa nei:

- (a) ia tauave le aoina mai ma le auiliiliina o faamatalaga o fuainumera faamauina ma faamatalaga e fesootai i ai e uiga i -
 - (i) le tamaoaiga, agafesootai, duesueina o le faitau aofai o tagata e ala i tagata maliliu ma pepe fananau mai, ma isi uiga vaaia o Samoa; ma
 - (ii) gaoioiga a tagata, pisinisi ma isi faalapotopotoga ma faalapotopotoga tutoatasi i totonu o Samoa;
- (b) ia faatino ma uunaia talitonuga mautu, taualumaga, faauigaina ma le faavasegaina mo le faaaogaina i fuainumera faamauina aloaia e ogatasi ma faiga faava o malo aupito i sili ona lelei;
- (c) ia lomia i se tulaga tutoatasi fuainumera faamauina aloaia e aunoa ma le faatuai;
- (d) ia feutagai, faufautua ma galulue faatasi ma faalapotopotoga a le Malo e uiga i galuega tau atinae tau fuainumera faamauina o lo o tauaveina e le Ofisa po o na faalapotopotoga;
- (e) ia fautuaina le Malo i mataupu e faatatau i faiga faavae tau fuainumera faamauina;

- (f) ia uunaia le aloese mai le toe faia o taumafaiga na faia muamua ma faamatalaga i le itu tau fuainumera faamauina aloaia;
- (g) ia uunaia ma fesoasoani i gaoioiga tau fuainumera faamauina a faalapotopotoga tumaoti ma galulue faatasi ma faalapotopotoga tumaoti i gaoioiga tau fuainumera faamauina e faavae i luga o a latou faamaumauga;
- (h) ia aloaia noataga faava o malo tau fuainumera faamauina a Samoa;
- (i) ia faia tusiga igoa o le faitau aofai o tagata ma fale, tusiga igoa o faatoaga ma suesuega ma isi tusiga igoa o aiaia i lalo o le Vaega IV;
- (j) ia suesueina ma faaalia manatu i le faauigaga ma le tulaga aloaia o so o se fuainumera faamauina ua lomia faasalalau, pe afai ua manatu le Ofisa e faapea ua talafeagai pe ua tatau ai lea tulaga;
- (k) ia uunaia le malamalamaaga ma le aogā talafeagai o fuainumera faamauina aloaia;
- (l) ia puleaina le Ofisa Resitala o Pepe Fananau Mai, Maliu ma Faaipoipoga, ma so o se isi lava ofisa resitala, pe afai ua faapea ona faatonuina e le Minisita.

8. Malosiaga o le Ofisa - E i ai i le Ofisa malosiaga uma ua talafeagai i luga o se mafuaaga tatau mo le faatinoga o so o se galuega tauave a le Ofisa po o le Faamau Fuainumera a le Malo i lalo o lenei Tulafono po o so o se isi lava tulafono.

9. Faaaogāina o le Tulafono o Galuega a le Malo 2004-(1) Ae vagana ai ua aiaia i se isi faiga e ese ai i totonusi o lenei Tulafono, e faaaogāina le Tulafono o Galuega a le Malo 2004 i le Faamau Fuainumera a le Malo, le Ofisa, ma ona tagata ofisa e faapei ai o le Ofisa o se Matagaluega.

(2) Ua faatatauina se tagata ofisa po o so o se isi lava tagata o lo o faafaigaluega po o galue i le Ofisa, o se tagata faigaluega a le Malo.

*Vaevaega 2 - Komiti Faatino Faufautua
o Fuainumera Faamauina*

10. Komiti Faatino Faufautua o Fuainumera Faamauina-
(1) Ua faavaeina le Komiti Faatino e aofia ai sui auai nei:

- (a) o se Taitaifono e tofia e le Minisita mo se vaitaimi e tolu (3) tausaga ma e agavaa mo le toe tofiaina;
- (b) o le Faamau Fuainumera a le Malo po o sona sui; ma
- (c) ia lē itiiti ifo i le toalima (5) ma ia lē silia i le toafitu (7) isi sui auai i le tuufaatasiga, e i ai le poto masani i mataupu tau fuainumera faamauina po o mataupu e fesootai i ai, o fai ma sui i se tulaga lautele e i ai aia i le tuuina atu ma le faaaogāina o fuainumera faamauina, e aofia ai faalapotopotoga a le Malo, tagata e ona galuega, iuni a tagata faigaluega, faamatalaga faatekonolosi, tamaoaiga, aia tau tupe ma faletupe, aia tau agafesootai, tagata e faaaogāina ma tagata e tuuina atu fuainumera faamauina o faalapotopotoga o tagata tomai faapitoa ma tagata e faaaogāina auaunaga.
- (2) O sui auai ua taua i le faafuaiupu (1)(c) e tofia e le Minisita mo se vaitaimi e lua (2) tausaga ma e faapena foi ona agavaa mo le toe tofiaina.
- (3) E lē agavaa se Sui Usufono o le Palemene e tofia e avea o se sui auai o le Komiti Faatino.
- (4) E agavaa se sui auai (seia vagana ai se sui auai o ia lea o se tagata faigaluega a se faalapotopotoga a le Malo) i totogifuapauina ma alauni e pei ona fuafuaina e le Kapaneta.
- (5) E avanoa le tofi o se sui auai (e ese ai na i le Faamau Fuainumera a le Malo) pe afai o le sui auai:
 - (a) ua toesea, mo, fonotaga sosoo e tolu (3) a le Komiti Faatino, e aunoa ma se faatagaga mai le Komiti Faatino; po o

- (b) ua aveesea mai le tofi e le Minisita, i se amioga lē pulea po o ua lē atoatoa le malosi o le tino ua faamaonia i se tulaga ua faamalieina ai le Minisita i luga o mafuaaga talafeagai; po o
- (c) ua avea o se sui usufono o le Palemene; po o
- (d) ua maliu.

11. Galuega tauave a le Komiti Faatino-(1) O le galuega tauave a le Komiti Faatino le fautuaina o le Minisita ma le Faamau Fuainumera a le Malo e uiga i tulaga nei:

- (a) o le faaleleia, faalauteleina, tuufaatasia ma le fetuunaiga o galuega po o gaoioiga tau fuainumera faamauina;
 - (b) so o se eseesege o tulaga faaletonu ua lē ausia i le tuuina atu o auauanga tau fuainumera faamauina;
 - (c) o le tulaga moni ma le mautinoa o le faatuatuaina o, ma le talitonuina ma le faamoemoeina o fuainumera faamauina e tagata lautele;
 - (d) o tulaga faamuamua ma polokalame o galuega e ao ona faaaogāina e le Ofisa;
 - (e) le uunaia o se siosiomaga lea e lagolagoina le aoina mai, tuuina atu, faalauiloanina ma le faaaogāina o fuainumera faamauina;
 - (f) le tausia o le tulaga agatapuia ma le malupuipuia o faamatalaga o tagata taitoatasi;
 - (g) le tausia o le tulaga tutoatasi, sao atoatoa, talafeagai, faatuatuaina, taimi e tatau ona faatino ai, ma tulaga faataatitia tau tomai faapitoa o faamatalaga o fuainumera faamauina.
- (2) E ao i le Faamau Fuainumera a le Malo ona:
- (a) tofia se tagata faigaluega o le Ofisa e avea ma Failautusi a le Komiti Faatino; ma
 - (b) tuuina atu i le Komiti Faatino punaoa e pei ona talafeagai ai mo le faatinoga lelei o ana galuega tauave.

(3) E mafai e le Komiti Faatino ona tuuina atu faamatalaga faalauaitele e uiga i so o se mataupu e faasino i ana galuega tauave i lalo o lenei Tulafono, i le maea ai ona feutagai ma le Minisita ma so o se faalapotopotoga a le Malo, po o isi tagata o lo o aafia ai i le mataupu.

12. Fonotaga ma komiti-(1) E ao i le Komiti Faatino ona fono a itiiti mai e faa-tasi i tausaga faale-kalena taitasi uma po o, e pei ona talafeagai ai mo le faatinoga o ana galuega tauave.

(2) O fonotaga a le Komiti Faatino e mafai ona taloina e le Taitaifono po o, e ao ona fofogaina e le Failautusi pe a talosagaina e ni sui auai se toatolu (3) o le Komiti Faatino.

(3) E tatau ona tuuina atu i sui usufono se faasilasilaga i aso faigaluega maoti e lima (5) e uiga i so o se fonotaga, seja vagana ai ua malie se sui auai ua aafia i se isi faiga e ese ai.

(4) I se fonotaga a le Komiti Faatino:

- (a) o le aofai o sui e mafai ai ona usuia se fonotaga e aofia ai le tasi-vae-tolu o sui auai o i ai nei;
- (b) e ao ona seei le Taitaifono i le nofoa pe afai o auai;
- (c) afai o toesea le Taitaifono, e ao i sui auai o lo o i ai ona filifili se toatasi (1) o i latou e seei i le nofoa;
- (d) so o se mataupu e tulai mai, e ao ona faia le faaiuga e le vaega aupito i toatele o palota a sui o lo o auai ma palota; ma
- (e) o le sui o lo o seei i le nofoa e i ai lana palota e faia ai le filifiliga ma se palota e faia ai le faaiuga.

(5) I le noatia ma le fai fuafua i lenei fuaiupu, e mafai e le Komiti Faatino ona faatonutonu faaletulafono ana ia lava taualumaga o fonotaga.

(6) E mafai e le Komiti Faatino ona tofia so o se komiti e tuuina atu fautuaga i le Komiti Faatino e uiga i mataupu e talafeagai i lalo o lenei Tulafono e faapea:

- (a) o le tulaga faasui auai e mafai ona aofia ai tagata o i latou ia e le o ni sui auai o le Komiti Faatino; ma
- (b) e agavaa se sui auai i totogi ua faamaonia e le Kapaneta, seja vagana ai pe afai o ia o se tagata faigaluega o le Malo, se sui e tofia faale-faavae, po o se sui usufono o le Palemene.

(7) E ao i le Failautusi ona faamautinoa e faapea, ia sainia i se tulaga sao atoatoa i le taimi lava lea otootoga o mataupu o fonotaga a le Komiti Faatino, e le taitaifono o le fonotaga ma lomia faasalalau i luga o le tuatusi faakomepiuta a le Ofisa.

Vaevaega 3 - Faamau Fuainumera a le Malo

13. Faamau Fuainumera a le Malo, galuega tauave ma malosiaga-(1) Ua faavaeina se Faamau Fuainumera a le Malo, ma e ao ona tofia i lalo o le fuaiupu 12 o le Tulafono o Galuega a le Malo 2004.

(2) O le Faamau Fuainumera a le Malo, o ia foi lea o le Ofisa Sili o Pulega o le Ofisa.

(3) O galuega tauave nei a le Faamau Fuainumera a le Malo:

(a) o le uluai galuega tauave autu o le faamautinoaina e faapea o lo o ia tauaveina lelei ma le atoatoa faatasi ai ma le Ofisa, a latou galuega tauave, tiute ma malosiaga i lalo o lenei Tulafono;

(b) ia fautuaina le Minisita e uiga i mataupu tau faiga faavae o fuainumera faamauina; ma

(c) ia faamautinoa e faapea sa usitaia ma o lo o usitaia e le Ofisa so o se maliega faafeagaiga tau le puipuiga ma faagasologa e pei ona talafeagai ai i luga o mafuaaga talafeagai e usitaia ai (ma faamautinoa le talitonuina e tagata lautele) o le tulaga agatapuia o aiaiga o lenei Tulafono;

(d) o isi galuega tauave ma malosiaga e pei ona faaee atu e -

(i) le Minisita, o lenei Tulafono po o so o se isi lava tulafono;

(ii) le malosiaga tuuina atu mai so o se tagata ma taliaina e le Faamau Fuainumera a le Malo.

14. Ofissa Sili Lagolago o Pulega ma isi tagata ofisa-(1) E mafai e le Faamau Fuainumera a le Malo ona tofia tagata ofisa nei o le Ofisa:

(a) o se Ofisa Sili Lagolago o Pulega; ma

(b) isi tagata ofisa galalue tumau pe galalue le tumau foi ma isi tagata faigaluega, e pei ona manaomia mo le faamoemoe o lenei Tulafono.

(2) E ao i se Ofisa Sili Lagolago o Pulega i lalo o le vaavaaiga a le Faamau Fuainumera a le Malo ona faatino so o se tiute aloaia lautele i lalo o lenei Tulafono e pei ona valaaauina ai e le Faamau Fuainumera a le Malo na te faatinoina.

15. Tulaga tutoatasi-(1) I le noatia ma le fai fuafua i lenei Tulafono ma le faafuaiupu (2), e ao i le Faamau Fuainumera a le Malo ona ia fuafuaina toatasi:

(a) po o a ma pe faapefea foi ona aoina mai, auiliili ma lomia faasalalau fuainumera faamauina; ma

(b) le tulaga lautele, faatulagaga ma le taimi o le lomiga faasalalau o fuainumera faamauina.

(2) E mafai e le Minisita ona tuuina atu se faatonuga tusitusia i le Faamau Fuainumera a le Malo e uiga i so o se mataupu ua taua i le faafuaiupu (1).

(3) E ao i le Faamau Fuainumera a le Malo ona usitaia le faatonuga ma e mafai ona ia faalauaiteleina e aunoa ma le fesiligia:

(a) e faapea o le aoina mai po o le auiliiliina o ia fuainumera faamauina ua amatalia po o ua faamutaina e ala i le faatonuga a le Minisita; po o

(b) e faapea o le lomiga faasalalau o ia fuainumera faamauina ua faatulai mai, faamutaina po o ua vave ona faatinoina po o ua faatuai e ala i le faatonuga a le Minisita.

(4) E ui lava i se tulaga tutoatasi o se faamatalaga faalauaitele ua faia i lalo o le faafuaiupu (3), e ao ona lomia faasalalau se faatonuga a le Minisita i lalo o le faafuaiupu (2), i luga o le tuatusi faakomepiuta a le Ofisa.

16. Aia tatau e faaalia ai manatu e uiga i fuainumera faamauina - E mafai e le Faamau Fuainumera a le Malo ona tuuina ai i totonu po o le faaalia o manatu po o auiliiliga, e faailoa manino ai ia tulaga, ina ia uunaia ai le malamalamamaaga i ia fuainumera faamauina pe a faamatuu atu pe lomia faasalalau, po o, pe a tali atu i manatu faaalia e uiga i ia fuainumera faamauina e pei ona lomia faasalalau.

17. Lipoti faaletausaga-(1) O le lipoti faaletausaga lea e manaomia le saunia e le Faamau Fuainumera a le Malo i lalo o le fuaiupu 15 o le Tulafono o Galuega a le Malo 2004, e ao ona aofia ai mea ua taua e faapea:

- (a) o se faamatalaga e uiga i so o se fautuaga mai le Komiti Faatino Faufautua o Fuainumera Faamauina ia e le i mulimulitaia po o ua faatinoina, faatasi ai ma mafuaaga;
- (b) se faamatalaga e uiga i so o se tulaga taua ua faailoa mai ai le aloese mai ai i faiga aupito sili ona lelei i le faatupulaia, aoina mai, auiliiliga, faamaoniga, po o le lomia faasalalau o fuainumera faamauina;
- (c) o se faamatalaga o so o se tulaga taua ua faailoa mai ai o le lē usitaia o noataga faava o malo a Samoa e tusa ai ma fuainumera faamauina aloaia (tusa lava pe fesootai i le Ofisa, pe leai foi);
- (d) se faamatalaga faalauaitele o so o se tulaga ua solia ai noataga agatapuia ua faaee atu e lenei Tulafono (ae peitai ia lē ina ia faatuputeleina ai le soliga o le tulafono);
- (e) se faamatalaga, e aunoa ma se manatu faaalia i so o se faatonuga ua tuuina atu e le Minisita i lalo o le fuaiupu 15(2), e tusa lava po o ua faailoa faalauaitele atu i tagata pe leai foi.

(2) E ao ona lomia faasalalau le lipoti faaletausaga i luga o le tuatusi faakomepiuta a le Ofisa ma, faaavanoa atu i lona ofisa autu i totonu o le masina e tasi (1) i le maea ai ona faamaonia e le Minisita, ma e ao ona tumau ai pea ona avanoa a itiiti mai e lima (5) tausaga.

VAEGA III TAIALA FAAVAE, FAAMATALAGA MA FEUTAGAIGA

18. Taiala faavae lautele-(1) O le Ofisa:

- (a) o le pulega autu lea i Samoa mo le aoina mai, auiliiliina, ma le lomia faasalalau o fuainumera faamauina aloaia, ma le tuufaatasiga o gaoioiga tau fuainumera faamauina i totonu o Samoa; ma

- (b) e ao ona faaaogāina taiala faavae tau tomai faapitoa talafeagai ma tausisia tulaga faataatitia o amioga ua aloaia lelei i le faatinoga o ana galuega tauave, ma le faatinoga o ona malosiaga; ma
- (c) afai ua faaeeina atu noataga i so o se tagata po o se vaega o tagata, e ao ona amanaia le tulaga o faafitaui ma tupe alu e ono mafai ona faaee atu i luga o ia tagata, ma le aogā tuusao pe lē tuusao foi o faamatalaga e aoina mai i ia tagata, ma isi, a o lumana ai le faaeeina atu o noataga.
- (2) E ao i le Ofisa, le Faamau Fuainumera a le Malo, ma se tagata ofisa, ona faamautinoa le tulaga agatapuia o faamatalaga tau i le tagata lava ia ma faamatalaga maaleale faapisinisi o faamatalaga, ae vagana ai ua aiaia manino i se isi faiga e ese ai i totonu o lenei Tulafono po o so o se isi lava tulafono.

19. O faamatalaga e ao ona faaaogāina mo na o faamoemoega tau fuainumera faamauina - O faamatalaga e tuuina atu i le Faamau Fuainumera a le Malo po o le Ofisa i lalo o lenei Tulafono, e ao ona faaaogāina mo na o faamoemoega tau fuainumera faamauina, ma e na o tulaga lava e tusa ai ma lenei Tulafono.

20. Maualuga o le tulaga agatapuia-(1) O faamatalaga uma ua lomia faasalalau i lalo o lenei Tulafono e tatau ona faatulaga ina ia puipua mai ai so o se faamatalaga ua lomia faasalalau mai le mafai ona faailoagofie e so o se tagata (e ese ai na i le tagata o ia lea na tuuina atu le faamatalaga) e avea o faamatalaga e faasino i se tagata faapitoa seia vagana ai:

- (a) ua malie le tagata o ia lea na tuuina atu le faamatalaga i le lomiga faasalalau i lea faiga; po o
- (b) i le taimi na lomia faasalalau ai na tatau ona mafai ona uluai iloa i luga o mafuaaga tatau e faapea e mafai e se tagata ona faailoagofie le tagata e faasino i ai le faamatalaga.
- (2) E ao i se tagata ofisa po o se isi tagata o lo o umia o po o avanoa i se pepa o faamatalaga po o se isi suesuega faapena po o se faamatalaga ona faamautinoa e faapea, e le o vaaia, avanoa i se tasi le pepa o faamatalaga po o isi suesuega faapena po o faamatalaga, po o le faia o ni ata e nisi lava tagata e ese ai na i

lo le tagata ofisa po o tagata o i latou ia ua faia se tautoga po o se tautinoga i lalo o le fuaiupu 23 po o le 24.

(3) E lē faaaogāina le faafuaiupu (2) i le tulaga lautele e faapea na tuuina atu muamua le maliega tusitusia a le tagata o ia lea na tuuina atu le pepa o faamatalaga po o le faamatalaga.

(4) I so o se taualumaga tau le va o tagata po o taualumaga tau solitulafono ua tuaia ai se soliga o le faafuaiupu (3), e tatau i lea tagata ona faamaonia e faapea, o le maliega sa tuuina atu lava.

(5) E leai se mea i totonu o lenei Tulafono o taofia ai le Ofisa mai le faafoiina atu o faamatalaga i le tagata po o le faalapotopotoga a le Malo lea na tuuina atu lea faamatalaga.

21. Faatapulaaina o le faailoaina atu o nisi auiliiliga faatagaina-(1) I le avea ai o se tuusaunoaga i le fuaiupu 20, e mafai e le Faamau Fuainumera a le Malo ona faailoa atu faamatalaga nei i tagata lautele, po o i so o se tagata o ia lea ua ia talosagaina:

- (a) faamatalaga ua avanoa i ai tagata lautele e aunoa ma le solia ai o so o se tulafono;
- (b) faamatalaga e tuuina atu e so o se faalapotopotoga a le Malo pe afai e i ai se noataga o lea faalapotopotoga a le Malo e faalauaitele ai lea faamatalaga pe a talosagaina, po o le faamaonia i le Faamau Fuainumera a le Malo e faapea, o le a ia faavanoa atu lea faamatalaga i tagata lautele pe afai e talosagaina;
- (c) faamatalaga o se lisi o le faasologa o igoa ma tuatusi o galuega a tagata taitoatasi, e aofia ai lo latou faavasegaga ma le aofaiga o tagata o lo o galulue ai; ma
- (d) auiliiliga o fefaatauaiga i fafo atu o le atunu, fegasoloaiga o vaa ma vaalele, ma uta o oloa o lo o tagofia i taulaga ma malae vaalele.

(2) I le avea ai ma tuusaunoaga i fuaiupu 20 ma le 22, e mafai e le Faamau Fuainumera a le Malo, i luga o se talosaga tusitusia a le Loia Sili, ona faailoa atu faamatalaga nei i le Loia Sili:

- (a) faamatalaga e ono mafai ona fesoasoani i le puipuiga o le Tulaga Saogalemu o le Atunu o Samoa; ma

(b) faamatalaga e manaomia mo le manuia lautele o Samoa a o faagasolo se Tulaga o Faalavelave Tutupu Faafuasei po o se Faaaliga Faasalalau o Faalavelave Matuia ua faaalia manino i lalo o so o se tulafono.

(3) Afai ua maua e le Faamau Fuainumera a le Malo se talosaga i lalo o le faafuaiupu (1), e mafai e le Faamau Fuainumera a le Malo ona:

(a) tuuina atu faamatalaga i le tagata o ia lea na faia le talosaga; po o

(b) le faalauaitele o le faamatalaga i tagata lautele na i lo le tuuina atu i le tagata na faia le talosaga.

22. E lē mafai ona mauaina mai pe faailoaina atu faamatalaga agatapuia-(1) E lē tatau ona tuuina atu i lalo o le Tulafono o Malosiaga o Leoleo 2007 se tusi poloaiga e mataitua ni gaoioiga masalomia po o se tusi poloaiga e sueina ai, ina ia maua mai faamatalaga o manaomia ina ia tausia i tulaga agatapuia e lenei Tulafono.

(2) So o se faamatalaga e manaomia ina ia tausia i se tulaga agatapuia e lenei Tulafono e lē tatau ona:

(a) faailoa atu i so o se faagasologa o le mauaina mai i lalo o le Tulafono o Faamatalaga Molimau 1961 po o tulafono e puipua ai le faamasinoga;

(b) manaomia le tuuina atu i so o se tagata o lo o galue i le faafoega o lafoga po o isi tulafono; po o

(c) ia faailoa atu ma le lotomalie e le Faamau Fuainumera a le Malo, ina ia fesoasoani ai i le faafoega o so o se Tulafono, po o le fesoasoani i se faamasinoga i so o se taualumaga.

(3) O le Faamau Fuainumera a le Malo ma se tagata ofisa, po o se tagata o ia lea ua faia se tautoga po o se tautinoga i lalo o le fuaiupu 23 po o le 24, e le o se tagata na molimau na faamalosia po o se tagata molimau agavaa i so o se taualumaga tau le va o tagata po o taualumaga faasolitulafono e tusa ai o so o se faamatalaga lea e manaomia le tausia i se tulaga agatapuia e lenei Tulafono.

(4) E lē faaaogāina le faafuaiupu (2) ma le (3):

(a) i taualumaga mo so o se soligatulafono e faasaga i lenei Tulafono; po o

(b) pe afai ua tuuina atu e le tagata, o ia lea o le autu o le faamatalaga, lana maliega tusitusia i le faamatuu atu o faamatalaga agatapuia.

(5) O so o se faamatalaga lea e manaomia le tausia i se tulaga agatapuia e lenei Tulafono, ae peitai ua faamatuu atu ona o se mea sese po o se amioga ua lē tusa ai, e lē talia lava e avea ma faamatalaga molimau i so o se taualumaga tau le va o tagata po o taualumaga faasolitulafono e ese ai na i lo taualumaga mo se soligatulafono e faasaga i lenei Tulafono, po o taualumaga e faasaga i so o se tagata ua tuuaia i lona faamatuu atu o le faamatalaga.

23. Tautoga po o tautinoga a tagata ofisa e faasino i tulaga agatapuia-(1) E ao i se tagata ofisa, a o lumanai ai ona amatalia ona tiute tauave, ona faia ma faamaonia se tautoga po o se tautinoga i le pepa faatumu lenei:

“O A’u o [igoa] [ou te tauto/tautino atu] o le a ou faataunuina i le faamaoni ma le faatuatuaina ou tiute e avea o se tagata ofisa o le Ofisa o Fuainumera Faamauina, ina ia tusa ai ma manaoga o le Tulafono o Fuainumera Faamauina 2014 ma isi tulafono uma ma e faapea o so o se faamatalaga ua ou mauaina pe ua ou taliaina i le avea ai o a’u ma tagata ofisa o le Ofisa o Fuainumera Faamauina o le a:

(a) na o a’u lava e faailoaina atu e tusa ai ma ou tiute aloaia, a o faafaigaluegaina ai a’u, po o o lou galue ai e avea o se tagata ofisa; ma

(b) e na o a’u lava e faailoaina atu faatasi ai ma le pule faataga manino atoatoa a le Ofisa o Fuainumera Faamauina, i le tuanai ai o lena galuega po o le faamutaina o lou galue ai.

Ou te faailoa atu e faapea o so o se gaoioiga e faia po o se mea ua ou lē faia e solia ai lenei [tautoga/tautinoga] e mafai ona taunu ai i taualumaga tau le amio pulea po o le faamaloloina o a’u mai lau galuega, ma e mafai foi ona avea ai a’u ma autu i taualumaga faasolitulafono lea, pe afai

ae faamaonia ai faaletulafono sou moliaga, e mafai ona faasalaina ai a'u i se sala tupe po o le nofosala i le falepuipui, po o faasalaga uma e lua".

(2) E mafai ona faia le tautoga po o le tautinoga e so o se tagata, o ia lea e mafai ona faatautoina ai i ona luma se Faamatalaga Tauto e tusa ai ma le fuaiupu 14 o le Tulafono o Tautoga, Faamatalaga Tauto ma Tautinoga 1963.

24. Tautoga po o tautinoga a isi tagata-(1) E mafai e se tagata o ia lea o se tagata faigaluega a le Malo po o, o ia lea o lo o galue i, po o mo se faalapotopotoga faamaonia e avea ai o se tagata faigaluega po o se tagata galue faakonekarate mo le Ofisa, i luga o le pule faitalia a le Faamau Fuainumera a le Malo, ona faatagaina e faia se tautoga po o se tautinoga i totonu o le pepa faatumu ua taua i lalo (lea e mafai ona teuteuina e pei ona talafeagai ai mo tulaga faapitoa e aliae mai):

"O A'u o [Igoa] [ou te tauto atu/tautino atu] o le a ou tausisia i le faamaoni ma le faatuatuaina o manaoga o le Tulafono o Fuainumera Faamauina 2014 ma isi lava tulafono uma a Samoa, ma o so o se faamatalaga ou te mauaina pe ou te taliaina e faasino i mataupu tau fuainumera faamauina, o le a faaaogāina mo na o faamoemoega ia e faaaogāina ai [po o le faamaoti mai o le faamoemoe] ma o le a na o au e faailoaaina atu i le i ai faatasi ma le pule faataga manino atoatoa a le Ofisa o Fuainumera Faamauina.

Ou te faailoa atu e faapea ua maea ona ou faitauina ma malamalama i ou noataga i lalo o le fuaiupu 24(3) o le Tulafono o Fuainumera Faamauina 2014.

Ou te faailoa atu e faapea o so o se gaoioiga e faia po o se mea ua lē faia e solia ai lenei [tautoga/tautinoga], e mafai ona avea ai au ma autu i taualumaga tau solitulafono lea, pe afai e faamaonia faaletulafono ai i se moliaga, e mafai ona faasalaina ai au i se sala tupe po o le nofosala i le falepuipui, po o faasalaga uma e lua, i totonu o Samoa."

(2) E mafai ona faia le tautoga po o le tautinoga i luma o so o se tagata lea e mafai ona faia ai faamatalaga tauto i lalo o fuaiupu 14, 15 po o le 16 o le Tulafono o Tautoga, Faamatalaga Tauto ma Tautinoga 1963.

(3) O se tagata o ia lea ua na faia se tautoga po o se tautinoga i lalo o lenei fuaiupu:

(a) e mafai ona ia faatino so o se galuega tauave ma malosiaga o se tagata ofisa, e pei ona mafai ona faamaoti mai e le Faamau Fuainumera a le Malo;

(b) e i ai noataga ma tulaga aloaia uma o se tagata ofisa i lalo o lenei Tulafono;

(c) e mafai ona ia faaaogāina so o se pepa o faamatalaga po o isi faamatalaga tau fuainumera faamauina a le Ofisa i le taimi lava lea e talosagaina ai, po o le faatamaia po o le aveesea o pepa o faamatalaga po o isi faamatalaga tau fuainumera faamauina ma ata uma pe afai ua faapea ona talosagaina e le Ofisa o Fuainumera Faamauina.

(4) I totonu o lenei fuaiupu, “faalapotopotoga faamaonia”:

(a) o lona uiga o so o se faalapotopotoga, e aofia ai so o se itutino o Malo Aufaatasi, e tusa lava pe o i ai sona nofoaga i po o faagaoioia i totonu o Samoa pe leai foi, lea ua faamaonia e le Minisita mo faamoemoega o lenei fuaiupu i luga o mafuaaga e faapea, o lo o faafoeina ni suesuega talafeagai po o auiliiliga, po o tuuina atu le fesoasoani i le Ofisa; ma

(b) e aofia ai se faalapotopotoga a le Malo.

25. Galuega tauave tau fuainumera faamauina a isi faalapotopotoga a le Malo-(1) E mafai e le Faamau Fuainumera a le Malo, i le maea ai ona feutagai ma le ofisa sili o pulega po o le pule sili (po o le a lava le igoa o iloa ai) o se faalapotopotoga a le Malo, ona fautuaina le Minisita ma le Minisita o nafa ma lea faalapotopotoga a le Malo e faapea, o galuega tauave a lea faalapotopotoga a le Malo e faasino i le faatupulaia, aoina mai, auiliiliga, faamaoniga po o le lomia faasalalau o fuainumera faamauina:

- (a) ia faatino e le Ofisa, a le o i lona tulaga o po o le tuufaatasi ai ma le faalapotopotoga a le Malo; po o
- (b) ia faatino i se auala faapitoa ina ia ogatasi ai ma isi gaoioiga tau fuainumera faamauina po o faatinoga aupito sili ona lelei.
- (2) Afai ua malie i ai ma faapea ona faatonuina e le Minisita ma le Minisita o nafa ma se faalapotopotoga a le Malo, e ao i le faalapotopotoga a le Malo ona usitaia le faatonuga.
- (3) Afai e le o malilie i ai le Minisita ma le Minisita o nafa ma se faalapotopotoga a le Malo, e ao loa i le Minisita ona faasee atu le mataupu i le Komiti Faatino.
- (4) O se faatonuga ua tuuina atu i lalo o le faafuaiupu (2) o le a lē faatagaina ai pe manaomia ai le faalapotopotoga a le Malo po o le tagata faigaluega a, po o se tagata galue faakonekarate i le faalapotopotoga a le Malo ina ia faia se gaoioiga e solia ai so o se noataga agatapuia ua faaee atu i luga o lea faalapotopotoga a le Malo, po o tagata i lalo o so o se tulafono faamamaluina po o tulafono.
- (5) E lē tatau i le tagata faigaluega a, po o se tagata galue faakonekarate i se faalapotopotoga a le Malo, ona ia faagaoioia pe silasila i so o se faamatalaga ua aoina mai i lalo o le pule faataga a lenei Tulafono, seia vagana ai o lea tagata ua maea ona faia sana tautoga po o se tautinoga i lalo o le fuaiupu 24.

VAEGA IV TUSIGA IGOA MA SUESUEGA E AOINA MAI AI FAAMATALAGA

26. O le Faamau Fuainumera a le Malo e faia tusiga igoa o le faitau aofia o tagata, fale, ma faatoaga-(1) E ao i le Faamau Fuainumera a le Malo ona faia se tusiga igoa o le faitau aofai o tagata ma fale i le tausaga 2016, ma i totonu o lona 5 o tausaga taitasi uma mulimuli ane ai.

(2) E ao i le Faamau Fuainumera a le Malo ona faia se tusiga igoa o faatoaga i le 2019, ma i totonu o lona 10 o tausaga taitasi uma i le maea ai o lena tusiga igoa.

(3) Afai ua faatonuina e le Minisita i se isi faiga e ese ai, o se tusiga igoa ua taua i totonu o lenei fuaiupu e ao ona faia i se vaitaimi puupuu na i lo le tulaga o lo o aiaia, ma afai ae tulai mai lenei tulaga, e toe amatalia le vaitaimi e 5 po o le 10 tausaga mai le aso e faia ai le tusiga igoa.

(4) O le aso ma le taimi lea e taua e faia ai tusiga igoa taitasi o lo o faasinomia i totonu o lenei fuaiupu, e ao ona faamaoti mai e le Minisita e ala i se Faasilasilaga e lomia faasalalau i totonu o le Savali.

(5) O le vaitaimi ua tuuina atu i totonu o lenei fuaiupu mo se tusiga igoa, e mafai ona faalautele atu e ala i se Faasilasilaga a le Minisita, pe afai ua taofia i se faaaliga manino o se faalavelave tupu faafuasei i le atunu, le faamaeaina o le tusiga igoa ua aafia ona o le faalavelave tupu faafuasei.

27. Faamatalaga o le aoina mai i tusiga igoa o le faitau aofai o tagata ma fale-(1) I le faia ai o se tusiga igoa o le faitau aofai o tagata ma fale, e ao ona maua mai se tagata o lo o nofoia po o vaaia se fale e mau ai tagata o faamatalaga faapitoa nei:

- (a) le igoa ma le tuatusi, ituaga, matua o tausaga, ma tapuaiga o lo o galulue ai tagata uma o lo o nofoia fale e mau ai; ma
- (b) le nofoaga o i ai, le aofai o potu, tagata e ona ma le aofai o tagata o lo o nofoia, i le po lea na fai ai le tusiga igoa.

(2) I le taimi e faia ai se tusiga igoa o le faitau aofai o tagata ma fale, e mafai e le Faamau Fuainumera a le Malo, pe afai ua ia manatu ua talafeagai ai ona faia faapea mo le manuia o tagata lautele, ona aoina mai faamatalaga e faasino i so o se mataupu ua taua i le Pepa o Faamatalaga, mai lē o nofoia po o se tagata o lo o vaaia se fale.

28. Suesuega ma isi tusiga igoa-(1) I so o se taimi lava e manatu ai le Faamau Fuainumera a le Malo ua talafeagai ai, e mafai e le Faamau Fuainumera a le Malo ona faia se duesuega po o nisi tusiga igoa o so o se mataupu ua taua i le Pepa o Faamatalaga.

(2) E mafai e le Minisita, e ala i se Poloaiga i le Savali, ona teuteu le Pepa o Faamatalaga.

29. Auala e aoina mai ai faamatalaga - Ina ia mafai ona aoina mai faamatalaga e ala i se tusiga igoa po o se suesuega, e ao i le Faamau Fuainumera a le Malo ona:

- (a) fuafuaina se pepa o faamatalaga e pei ona manatu le Faamau Fuainumera a le Malo ua talafeagai ai, lea o lo o talosagaina ai faamatalaga auiliili e talafeagai ma le tusiga igoa po o suesuega; ma
- (b) tuuina atu se pepa o faamatalaga i so o se tagata ua aafia ai, fale e mau ai tagata po o nofoaga o pisinisi, e ala i so o se faiga e manatu le Faamau Fuainumera a le Malo ua tatau ai, i luga o mafuaaga talafeagai (lea e mafai ona aofia ai faasilasilaga o le nofoaga e mafai ona maua mai ai pepa o faamatalaga faaeletoroni); ma
- (c) faavanoa pepa faaopoopo o faamatalaga mo le aoina mai i nofoaga talafeagai i le amanaia ai o le autu moni o le tusiga igoa po o suesuega; ma
- (d) tauaveina isi mataupu e pei ona faatonuina e tulafono faatonutonu.

30. Tiute tauave o le faamaeaina o pepa o faamatalaga ma tuuina atu o faamatalaga-(1) E ao i se tagata o vaia se fale o mau ai tagata ona tuuina atu, i le mea e gata ai lona iloa i le sao atoatoa ma i se tulaga aoaotetele o faamatalaga uma e manaomia i se tusiga igoa po o se suesuega i totolu o le taimi ua faamaoti mai e le Faamau Fuainumera a le Malo.

(2) Afai e le o i ai se tagata o vaia se fale e mau ai tagata, e ao i se tagata o nofioia ona tuuina atu, i le mea e gata ai lona iloa, i le sao atoatoa ma i se tulaga aoaotetele o faamatalaga, e manaomia i se tusiga igoa po o se suesuega i totolu o le taimi ua faamaoti mai e le Faamau Fuainumera a le Malo.

(3) O se tagata o ia lea o toesea mai i se fale e mau ai, i le po o e faia ai se tusiga igoa, e i ai ona tiute tauave tutusa e pei o tagata ia o lo o nonofo ai i le fale e mau ai tagata.

(4) I so o se isi lava tulaga, e ao i se tagata o lo o manaomia le tuuina atu o faamatalaga po o le faamaeaina o se pepa o faamatalaga po o se suesuega ia faapea ona faia, i le mea e gata

ai lona iloa, i le sao atoatoa ma i se tulaga aoaotetele o faamatalaga.

(5) Afai o le fare e mau ai tagata e toalua (2) pe sili atu ni tagata o lo o vaaia po o tagata o lo o nofoia, e ao ia i latou taitoatasi ona tuuina atu, i le mea e gata ai lo latou iloa, faamatalaga uma e manaomia i se tusiga igoa po o se suesuega; ae peitai o le faatinoga o lea tiute tauave e so o se tasi o i latou, ua faamatuu ese atu ai le tiute o le tasi po o isi.

(6) Afai o se tusiga igoa po o se suesuega ua manaomia ai faamatalaga mai se faalapotopotoga ua tuufaatasia faaletulafono, e ao i faatonu po o tagata o lo o latou umia tofiga faapena po o, tagata o lo o vaaia le faalapotopotoga ua tuufaatasia faaletulafono, ona tuuina atu taitoatasi i le mea e gata ai lo latou iloa, faamatalaga uma e manaomia i lea tusiga igoa po o se suesuega; po o le faamautinoa e faapea o lo o faia faapea e se tasi o i latou.

(7) I totonusi o lenei fuaiupu, “faamatalaga” e aofia ai so o se tusi faamaonia po o se tautinoga e manaomia e le Faamau Fuainumera a le Malo.

31. Tiute tauave ina ia maua mai pepa o faamatalaga mo tusiga igoa-(1) E ao i se tagata o ia lea na te le i mauaina se pepa talafeagai o faamatalaga ma ua faamoemoe na te tuuina atu faamatalaga e manaomia i se tusiga igoa ona:

- (a) maua mai ai lea pepa o faamatalaga mai le Faamau Fuainumera a le Malo; ma
- (b) faamaea le pepa o faamatalaga e pei ona manaomia; ma
- (c) taofia le pepa o faamatalaga seia vagana ua aoina mai e se tagata ofisa faatagaina, po o le faafoi atu o le pepa o faamatalaga ua maea, e tusa ai ma so o se faatonuga e mauaina mai le Faamau Fuainumera a le Malo.

(2) I so o se moliaga o se tagata ua ia lē faamaeaina po o ua lē faafoiina atu se pepa o faamatalaga o se tusiga igoa, e le o se tetee le faapea e le i faaooina atu i le tagata se pepa o faamatalaga.

32. Tuusaunoaga i tiute tauave lautele mo tusiga igoa-(1)

E agavaa se tagata e talosagaina le fesoasoani mai le Ofisa e faamalieina ai ana noataga, o ia lea ua ia lē mafai ona faamaea se pepa o faamatalaga e mafua mai i le lē iloa ona faitau ma tusitusi po o ua gasegase, po o ua lē tuuina atu o faamatalaga e faasino i se tusiga igoa o le faitau aofai o tagata ma fale, po o se tusiga igoa o faatoaga.

(2) O se tagata o ia lea ua tetee e tusia le tapuaiga po o le lotu lea e i ai o ia, po o pe o i ai o ia i so o se tapuaiga po o se lotu, e mafai ona ia teena pe e lē tuuina atu lea faamatalaga; ae peitai e lē agavaa lea tagata na te tuuina atu ni faamatalaga sese e tusa ai ma lea tulaga.

33. O pisinisi mai fafo o lo o faagaoioia i totonu o Samoa-

(1) O aiaiga o lenei Tulafono e faasino i tusiga igoa, pepa o faamatalaga, suesuega ma le tuuina atu o faamatalaga, e faaaogā i tagata o lo o nonofo i fafo atu o Samoa ma faalapotopotoga po o faalapotopotoga ua tuufaatasia faaletulafono pe na faavaeina i fafo atu o Samoa, pe afai o lo o tauaveina a latou pisinisi i totonu o Samoa po o e i ai ni a latou aia, i totonu o Samoa.

(2) O noataga o lo o faaaogāina i tagata, faalapotopotoga po o faalapotopotoga ua tuufaatasia faaletulafono ua taua i le faafuaiupu (1), e tatau ona usitaia e o latou pule, loia po o isi tagata sooupu i totonu o Samoa, e avea ai ma o latou sui.

(3) E leai se mea i totonu o le faafuaiupu (2) e manaomia ai se loia e faia se mea e soli ai tulaga aloaia i le va o loia ma tagata e faaaogāina auaunaga.

34. Aia tatau tau asiasiga ma tiute tauave e usitaia ai o talosaga-(1) I le noatia ma le fai fuafua i le faafuaiupu (2) ma le (3), e mafai e le Faamau Fuainumera a le Malo po o se tagata ofisa faatagaina ona:

- (a) ulufale i so o se nofoaga o pisinisi; ma
- (b) asiasia so o se vaega o nofoaga po o meatotino, so o se oloa o lo o teuina po o ofoina mo le faatauina atu ma so o se tusi o faamatalaga tau tuge, pepa aloaia po o isi faamaumauga faapisinisi; ma

(c) manaomia so o se tagata o ia lea e masani ona maua ai i lana tausiga so o se tusi o faamatalaga tau tupe, pepa aloaia po o isi faamaumauga faapisinisi, ina ia tuuina atu meataitasi ua manaomia mo le asiasi i totonu o le 48 itula, po o sea vaitaimi umi e pei ona mafai ona faamaoti mai e ala i le talosaga i le taimi na faia ai.

(2) E lē tatau i le Faamau Fuainumera a le Malo, po o so o se tagata ofisa ua faapea ona faatagaina atoatoa, ona faatino malosiaga i lalo o le faafuaiupu (1) seia vagana ai ua faia i lalo o le pule faataga a se tusi poloaiga ua faia i lalo o le faafuaiupu (3).

(3) E mafai e se Faamasino ona tuuina atu se tusi poloaiga (“tusi poloaiga”) e ulufale ai ma sailia so o se nofoaga o galuega pe afai o le Faamasino:

(a) ua ia mauaina se talosaga ua faatautoina a le Faamau Fuainumera a le Malo o po o se tagata ofisa faatagaina; ma

(b) ua faamalieina e faapea, e talafeagai le tuuina atu o se tusi poloaiga mo le faamoemoe o lenei fuaiupu.

(4) Ua faatagaina i le tusi poloaiga le tagata ua taua ai lona igoa e:

(a) ulufale atu, i so o se taimi talafeagai, i so o se nofoaga o pisinisi ma asiasi nofoaga ma so o se oloa o lo o teuina ai po o ua ofoina e faatau atu, ma so o se tusi o faamatalaga tau tupe, pepa aloaia po o isi faamaumauga faapisinisi; ma

(b) manaomia so o se tagata o ia lea e masani ona ia teuina so o se tusi o faamatalaga tau tupe, pepa aloaia po o isi faamaumauga faapisinisi, ina ia tuuina atu meataitasi ua talosagaina mo le asiasi i totonu o le 48 itula po o se vaitaimi umi e pei ona mafai ona faamaoti mai i totonu o le talosaga i le taimi na faia ai.

(5) I totonu o lenei fuaiupu:

“tagata ofisa faatagaina” o lona uiga o se tagata ofisa (e ala i lona suafa po o le tofiga faa-ofisa) o le Ofisa, ua faatagaina i se faiga tusitusia e le Faamau Fuainumera

a le Malo ina ia faatinoina malosiaga i lalo o lenei fuaiupu;
“nofoaga o pisinisi”:

- (a) e aofia ai se nofoaga o pisinisi lea o lo o, po o faapea foi ona aofia ai se fale e mau ai i lona atoaga po o i sona vaega (e pei o se fale talimalo po o se faatoaga); ae peitai
- (b) e lē aofia ai se nofoaga lea ua na o se fale e mau ai ma e le o faagaoioia ai se pisinisi.

35. Malosiaga e talosagaina ai le toe tuuina atu o faamatalaga - Afai ua faamautuina e se tagata o ia lea ua manaomia lona tuuina atu o faamatalaga i le Ofisa, e faapea ua usitaia le noataga, ae peitai e leai se faamaumauga a le Ofisa e taua ai ua ia taliaina, e mafai e le Ofisa ona talosagaina le tagata ina ia toe tuuina atu le faamatalaga i se pepa faatumu ua manaomia e le Ofisa.

VAEGA V AIAIGA ESEESE

36. E ao ona tuuina atu faasilasilaga i le Faamau Fuainumera a le Malo e uiga i le i ai o se galuega e faatino-(1) E mafai e le Faamau Fuainumera a le Malo ona tuuina atu se faasilasilaga i le gagana Samoa ma le faa-Peretania i le Savali, ma i so o se isi lava lomiga faasalalau lea e manatu o ia ua talafeagai ai, i le amanaia ai o le mataupu autu ua aofia ai, e faapea e ao ona faia se tusiga igoa po o se suesuega e manaomia ai le tuuina atu o faamatalaga e uiga i ituaiga galuega faatino ua faamaotiina e ao ona tuuina atu.

(2) Afai ua tuuina atu se faasilasilaga i lalo o le faafuaiupu (1), e ao i se tagata o ia lea o le a manaomia lona tuuina atu o lea faamatalaga ae peitai na te le i mauaina se talosaga maoti mo lea faamatalaga, (e tusa lava pe ala atu i se pepa o faamatalaga po o se isi faiga e ese ai) i totonu o le 21 aso mai le aso na tuuina atu ai le faasilasilaga, ona logoina le Faamau Fuainumera a le Malo, e uiga i le galuega faatino o i ai nei ma faamatalaga auiliili o fesootaiga a le tagata i totonu o aso faaopoopo e 21.

37. Faamatalaga molimau-(1) O se pepa aloaia e foliga mai ua sainia e, po o e avea ai ma sui o le Faamau Fuainumera a le Malo ma logoina atu ai e faapea o so o se tagata ofisa ua taua o lo o galue i lalo o le pule faataga a le Faamau Fuainumera a le Malo, seja vagana ua faamaonia i se isi faiga e ese ai, o faamatalaga molimau ua atoatoa o lea pule faataga ma e faapea na sainia le pepa aloaia e pei ona tulai mai ai.

(2) E mafai ona faaaogāina le saini ua faailogaina po o ua lolomiina a le Faamau Fuainumera a le Malo, po o so o se tagata ofisa, i luga o so o se pepa o faamatalaga, pepa faatumu o duesuega, faasilasilaga po o isi pepa aloaia e faasino i le pule faataga ua faatino e lea tagata e uiga i galuega tauave, tiute po o malosiaga i lalo o lenei Tulafono.

(3) Ua faatatauina so o se pepa o faamatalaga, duesuega, pepa faatumu, faasilasilaga po o isi pepa aloaia ua foliga mai o lo o i ai le saini tusitusia ua faailogaina po o ua lolomiina a le Faamau Fuainumera a le Malo, po o so o se tagata ofisa, ua, avea mo faamoemoega uma, ma i totonu o taualumaga uma e faapea, na sainia e le tagata o ia lea e ona le saini lea o lo o aliali mai ai i luga, seja vagana ua faamaonia i se isi faiga ese ai.

(4) E ao ona faaaogāina faasilasilaga faa-faamasinoga o so o se saini ua taua i lenei fuaiupu ma le tulaga moni e faapea, o le tagata o ia lea e ona le saini lea e aliali mai o lo o ia umia pe sa umia le tofi o le Faamau Fuainumera a le Malo po o, se tagata ofisa o galue ai pe sa galue muamua ai, i le a lava le tulaga o i ai.

(5) E tatau ona faaaogāina se faasilasilaga faa-faamasinoga o so o se Faatonuga ua lomia faasalalau i totonu o le Savali.

38. Soligatulafono-(1) Ua faia se soligatulafono e se tagata o ia lea ua ia lē usitaia le fuaiupu 20, ma e noatia i luga o se moliaga ua faamaonia faaletulafono:

(a) pe afai o le gaoioiga na faia pe o se mea ua lē faia, po o na faatagaina ma le iloa lelei, o le a tulai mai ai se tulaga e solia ai le fuaiupu 20, i se sala tupe e lē silia le 20 iunite tau faasalaga po o le nofosala i le falepuipui mo se vaitaimi e lē silia le lua (2) tausaga, po o faasalaga uma e lua;

(b) i so o se isi lava mataupu, o se sala tupe e lē silia le 20 iunite tau faasalaga.

(2) O se tagata o ia lea (e le i faataunuina sana tautoga po o se tautinoga e pei ona manaomia e lenei Tulafono) ua ia taumafai e maua se avanoa i po o i se gaoioiga e faia ma le loto i ai po o se mea ua lē faia e maua ai le avanoa i faamatalaga ia e faatoa mafai lava ona avanoa i ai tagata ua maea ona faia a latou tautoga ma tautinoga, ua faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 20 iunite tau faasalaga, po o le nofosala i le falepuipui mo se vaitaimi e lē silia le lua (2) tausaga, po o faasalaga uma e lua.

(3) O se tagata o ia lea ua ia faia se tautoga po o se tautinoga i lalo o le fuaiupu 24(3) ma ua ia maua se avanoa po o ua tuuina i ai le avanoa i faamatalaga, ae peitai e le o usitaia so o se manaoga po o se tulaga faasaina i lalo o lea fuaiupu, ua ia faia se soligatulafono ma e noatia i luga o moliaga laiti i se sala tupe e lē silia le 20 iunite tau faasalaga.

(4) O se tagata o ia lea ua ia lē usitaia le fuaiupu 30 po o le 31, ua ia faia se soligatulafono ma e noatia i luga o moliaga ua faamaonia faaletulafono:

(a) pe afai na faaauau pea ona solia i le tuanai ai ona toe faamanatu ia te ia o ana noataga, i se sala tupe e lē silia le 20 iunite tau faasalaga;

(b) i so o se isi lava mataupu, i se sala tupe e lē silia le 2 iunite tau faasalaga.

(5) O se tagata o ia lea ua ia tuuina atu faamatalaga e manaomia i lalo o lenei Tulafono e faapea ua iloa e le tagata e sese, e lē maea po o e tau faasese, ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 20 iunite tau faasalaga.

(6) O se tagata o ia lea ua ia lē usitaia le fuaiupu 36(2), ua ia faia se soligatulafono ma e noatia i luga o moliaga ua faamaonia faaletulafono i se sala tupe e lē silia le 20 iunite tau faasalaga.

(7) Afai ua faamaonia se soligatulafono a se tagata i lalo o le faafuaiupu (4)(a), (5) po o le (6):

(a) e mafai e le Faamasinoga ona poloaia le tagata ina ia faatino ana noataga i se tulaga atoatoa ma lelei; ma

(b) afai ua lē mafai ona faia faapea e le tagata i totonu o le taimi ua faamaotiina e le Faamsinoga, ua faia e le tagata uiga lē migao i le Faamsinoga.

(8) Afai ua faamalieina le Faamsinoga e faapea na faia se soligatulafono ua faamatalaina i totonu o lenei fuaiupu mo le faamoemoe ina ia maua mai ai se tupe, e mafai e le Faamsinoga ona faaee atu se sala tupe faaopoopo e lē silia le aofai e faatoluina (3) le tau aogā o taui tau tupe e mafua mai le tagata solitulafono mai le faataunuina o le soligatulafono.

39. Faatonuga faa-Minisita-(1) E mafai e le Minisita, e ala i se Faasilasilaga e lomia faasalalau i le Savali, ona tuuina atu faatonuga mo faamoemoega uma po o so o se tasi o faamoemoega nei:

(a) pepa o faamatalaga, suesuega, faasilasilaga, o isi pepa faatumu ma pepa aloaia, ma auala o le tufatufaina atu, avanoa i ai i ia pepa ma le latou tuuina atu, e aofia ai auala faaeletoroni, ma manaoga e fesootai i ai mo numera tatala po o taiala faailo e avanoa ai ma faamaoniga o mea e iloagofie ai e pei ona talafeagai ai i tulaga ua aliae mai;

(b) faailoagofie ituiga fuainumera faamauina ia e mafai ona aoina mai i so o se tusiga igoa po o suesuega ia e faaopoopo atu i ia o lo o faamaoti mai i le Pepa o Faamatalaga;

(c) faatonuina so o se isi mataupu, e ogatasi ma lenei Tulafono, e pei ona manatu ua talafeagai ai po o le faanatinati ai o le faamamaluina atoatoa o lenei Tulafono ma lona faafoega lelei.

(2) O faatonuga e tuuina atu i lalo o lenei fuaiupu e mafai:

(a) ona faaaogāina faalauaitele po o le faatapulaaina; ma
 (b) manaomia ai le faia o se tautinoga faaletulafono.

(3) Afai e le i tuuina atu ni Faatonuga mo se pepa o faamatalaga, suesuega po o pepa faatumu, e mafai e le Faamau Fuainumera a le Malo ona faamaonia mea o lo o aofia ai ma le faatulagaga o le pepa o faamatalaga, suesuega po o pepa faatumu ma isi mataupu ua taua i le faafuaiupu (1)(a).

40. Tulafono Faatonutonu - E mafai e Le Ao o le Malo, i le faia i luga o le faantuaga a le Kapaneta, ona faia tulafono faatonutonu:

- (a) e talafeagai mo le faatinoga po o mo faamoemoega o lenei Tulafono; po o
- (b) e noatia i le uluai faamaoniga a le Komiti Faatino o Tupe Maua a le Atunuu, e faatonuina ai totogifuapauina po o fua faataau e totogi mo so o se galuega ua faatonuina le faia e so o se tagata na auina atu e le Faamau Fuainumera a le Malo, po o le Ofisa i luga o faavae o le toe faaolaina o tau po o, mo le faamoemoega o lenei Tulafono.

41. Soloia, teuteuga tau soloaiga ma teuteuga faatupulaia-(1) Ua soloia le Tulafono o Fuainumera Faamauina 1971 (“Tulafono ua soloia”).

(2) I le amata faamamaluina ai o lenei Tulafono:

- (a) e faaauau pea gaoioiga po o mataupu uma o lo o faia po o faatinoina i le taimi nei i lalo o le Tulafono ua soloia e faapei ai o lo o faia po o faatino i lalo o lenei Tulafono;
- (b) e faaauau pea lomiga faasalalau uma na faia i lalo o le Tulafono ua soloia e faapei ai na faia ma lomia faasalalau i lalo o lenei Tulafono;
- (c) e faaauau pea le Faamau Fuainumera a le Malo ma so o se tagata ofisa po o tagata faigaluega o le Ofisa o Fuainumera Faamauina i lalo o aiaiga o latou tofiga o lo o faigaluega ai i le taimi nei, e faapei ai na tofia i latou e tusa ai o lenei Tulafono.

(3) I totonusi o le Tulafono o le Faamauina o Pepe Fananau Mai, Maliu ma Faaipoipoga 2002:

- (a) mo le fuaiupu 3, ia suia e faapea -

“3. Ia avea le Faamau Fuainumera a le Malo ma Resitara Aoao o Pepe Fananau Mai, Maliu ma Faaipoipoga-(1) O le Faamau Fuainumera a le Malo ua tofia e tusa ai ma le Tulafono o Fuainumera Faamauina

2014, o le Resitara Aoao foi lena o Pepe Fananau Mai, Maliu ma Faaipoipoga.

(2) E nafa le Resitara Aoao ma le faafoeina lelei o lenei Tulafono.

(3) I le faafoeina ai o lenei lava Tulafono, e i ai i le Resitara Aoao malosiaga ua faaee atu i ai e na o lenei Tulafono, ma e lē mafai ona faatino ona malosiaga i le avea ai ma Faamau Fuainumera a le Malo i le faataunuina o ona tiute tauave, o le Resitara Aoao i lalo o lenei Tulafono.”; ma

(b) mo le fuaiupu 4(1), ia suia e faapea -

“4. Tofiaina o le Resitara/Ofisa Sili Lagolago o Pulega ma Tagata Ofisa Sinia o le Ofisa Resitala-(1) E mafai e le Resitara Aoao ona tofia ia tagata ofisa o Galuega a le Malo po o le Ofisa o Fuainumera Faamauina a Samoa, po o i le igoa po o, e ala i le tofiga e avea ai ma Ofisa Sili Lagolago o Pulega ma Tagata Ofisa Sinia o le Ofisa o Resitala, e pei ona mafai ona manaomia mo le faafoega lelei ma taunuuga lelei o lenei Tulafono.”.

(c) so o se faasinomaga i le Tulafono o le Faamauina o Pepe Fananau Mai, Maliu ma Faaipoipoga 2002 (seia vagana ai mo le fuaiupu 3 ma le 4(1)) i le -

(i) ua aveesea le upu “Resitara” ma suia i upu “Resitara Aoao”; ma

(ii) ua aveesea upu “Sui Resitara” ma suia i upu “Resitara” po o le “Ofisa Sili Lagolago o Pulega”.

FAAMATALAGA

Fuaiupu 27 ma le 28

GALUEGA TAU FUAINUMERA FAAMAUINA PO O TUSIGA IGOA PO O SUESUEGA

**1.0 Fuainumera o duesuega o le faitau aofai o tagata
ma agafesootai**

- 1.1 Faitau aofai ma femalagaaiga
- 1.2 Leipa ma galuega
- 1.3 Aoaoga
- 1.4 Soifua Maloloina
- 1.5 Tupe maua, tupe alu ma le faaaaogāina
- 1.6 Puipuiga o tagata ma tulaga maaleale
- 1.7 Nofoaga ma fale o lo o mau ai tagata soifua
- 1.8 Faamasinoga ma soligatulafono
- 1.9 Aganuu
- 1.10 Gaoioiga faaupufai ma isi gaoioiga i totonu o le atunuu
- 1.11 Faaaogāina o le taimi

2.0 Fuainumera faamauina o le tamaoaiga

- 2.1 Fuainumera faamauina o le aotelega o le tamaoaiga
- 2.2 Faamatalaga tau le tamaoaiga
- 2.3 Fuainumera faamauina o pisinisi
- 2.4 Fuainumera faamauina o vaega eseese:
 - 2.4.1 Faatoaga, vaomatua, faiga faiva
 - 2.4.2 Malosiaga
 - 2.4.3 Eliina o le elele, gaosiga o oloa, fausaga o fale
 - 2.4.4 Felauaiga ma fesootaiga
 - 2.4.5 Tagata tafafao maimoa
 - 2.4.6 Faletupe, inisiua, fuainumera faamauina o le tulaga tau tupe

- 2.5 Tupe a le Malo, fuainumera faamauina tau tupe ma vaega tumaoi
- 2.6 Fefaatauaiga faava o malo ma paleni o tupe totogi
- 2.7 Tau o oloa
- 2.8 Tau o leipa
- 2.9 Faasaienisi, tekonomosi ma suiga fou mo le faaleleiga

3.0 Fuainumera faamauina o le siosiomaga ma matata eseese

- 3.1 Siosiomaga
 - 3.2 Fuainumera faamauina faaitulagi ma nofoaga laiti
 - 3.3 Fuainumera faamauina o matata eseese ma tulaga e faailoa ai:
 - 3.3.1 Tulaga tau le soifuaga, tulaga mativa ma mataupu e aafia atoa ai le soifuaga o tagata lautele
 - 3.3.2 Kenera, tupuaga faaleatunuu ma vaega faapitoa o le faitau aofai o tagata
 - 3.3.3 Sosaiete tau faamatalaga
 - 3.3.4 Faailoilo e fesootai ma Sini Tau Atinae o le Meleniuma ma isi feagaiga ma maliega faava o malo o avea ai Samoa ma vaega auai
 - 3.3.5 Atinae gafataulimaina
 - 3.3.6 Tulaga faapisinisi
-